



Las participantas taidlan attentamain la discussiun al podium – mesemna saira en la biblioteca da la citad a Cuira.

Chattar l'entrada en la politica

«Reparti vossas cartas da visita» – a l'occurrenza da la promoziun politica da dunnas giuvnas èn las participantas vegnidas animadas da daventar activas, da sa colliar e da s'infurmar. L'event da mesemna saira a Cuira è vegnì organisà dal Post da stab per l'egualità da las schanzas (PES) e da la Sessiun dals giuvenils dal Grischun.

LAURA SCHÜTZ/FMR

Mesemna encunter saira en la biblioteca da la citad a Cuira: plimatschs, sutgas, maisas e placats vegnan semtgads. Adina dapli mattas e dunnas tranter 13 e 30 onns sa rimnan en ina stanza davos en la biblioteca. «Jau ma sun gia participada al parlament da mattas e discutesch gugent cun la famiglia u en scola davart temas politics», di *Sina Stricker*. La giuvna da 14 onns da Cazas spera da survegnir bleras infurmaziuns davart ina carriera politica pussaivla.

Biografias da politicras giuvnas

Avant che daventar sezzas activas, emprendan las participantas d'enconuscher autras carrieras politics, quai durant ina discussiun al podium tranter quatter politicras giuvnas. *Chantal Wernli* dal PES moderescha il discours cun *Géraldine Danuser* da la Partida verd-liberala (PVL) grischuna cun *Flavia Aebli* dals Giuvens liberals (GL) grischuns, cun *Martina Widmer* da l'Allianza dal Center (AdC) giuvna grischuna e cun *Julia Müller* da la Partida socialdemocratica (PS).

«Co avais vus chattà la via en la politica?», è ina da las emprimas dumondas. Flavia Aebli raquinta d'in onn da barat, nua ch'ella ha discussiunà cun glied d'auters pajais davart lur systems politics. «Quai m'ha tranter auter motivà da m'engaschar. Sa decider per ina partida n'è però betg stà simpel.» I gidia d'esser commembra d'ina partida per avair in effect, èn las giuvnas da l'avis. «Jau chat ch'ins dastgia schizunt sco deputada dal Cussegl Grond anc midar la partida, anzi, quai mussa la fermezza da pudair conceder, sche las atgnas valurs sa midan», di

Martina Widmer. «Ins na vegn mai sfurzà da sustegnair in'opiniun, e politica è adina lavur da team», accentuescha Julia Müller.

È ina candidatura lura necessaria per daventar activa? Martina Widmer di da na, lavur voluntaria saja era fitg custavla. «Ins sto però far attenziun che betg mo las dunnas fetschian la lavur zuppada», replitgescha *Géraldine Danuser*. Quai l'haja era motivà da daventar presidenta. Ses plans per il futur na vul ella dentant betg tradir: «Insatgi m'ha ina giada ditg ch'ins na daventia mai quai ch'ins raquinta publicamain», di ella riend.

Martgà politic

Suenter ina curta pausa è la stanza vegnida restructurada ad ina sort piazza da martgà cun plirs stans d'infurmaziun. «La finamira è da s'infurmar e rimnar contacts», fa *Barbara Wülser* dal PES l'avertura. Per quest intent han las participantas survegnì cartas da visita cun lur numms a l'entschatta da la saira.

«Jau na fatsch forsà betg uschè buna reclama, perquai che jau sun mo in um – politica verda n'era però anc mai uschè dumandada sco uss», di in represchentant dals Giuvens Verds (GV) grischuns riend. Uschia ha mintga stan la chaschun da sa preschentar. Tut las partidas giuvnas, cun excepziun da la giuvna Partida populara (PPS) grischuna èn da la partida. Era la Sessiun dals giuvenils ed activistas da la chauma per il clima e da la chauma da las dunnas fan attent a lur acziuns. «Igl è impurtant che glied giuvna s'engascha, perquai che la politica decida davart noss futur», di *Ira Schweizer*, activista dal clima. Ella spera da pudair recrutar novas commembras. Il temp passa svelto al martgà: I vegn discussiunà ed empruvà da per-



Las spetgas da Sina Stricker da Cazas èn vegnidas ademplidas.

FOTOS LAURA SCHÜTZ

svader autras da las atgnas valurs. Era il cusseglier guvernativ *Jon Domenic Parolini* visita l'event e stat a disposiziun per dumondas. «Uss pudais vus era discurre rumantsch», manegia Barbara Wülser.

Facit positiv

Las conclusiuns durant la runda finala èn positivias. «Igl è stà bel da discurre cun glied da la medema opiniun», di *Luna Weggler* da la chauma da dunnas. «Nus ans legrain sche vus as annunziats», fan ils GL grischuns curascha.

E co statti cun las spetgas da las participantas? «Quellas èn vegnidas ademplidas», di Sina Stricker. Ad ella haja plaschi bain da rimnar contacts. Gugent avess ella però anc survegnì infurmaziuns pli concretas co entrar en la politica.

«Durant discurre cun las participantas hai jau survegnì l'impressiun ch'intginas èn gia fitg decisas d'entrar en la politica», constatescha Jon Domenic Parolini. Tenor el èsi impurtant ch'i dettia dapli idols per dunnas giuvnas. Tgi sa, forsà han ils represchentants e represchentas da questa saira pudì servir ad ina u l'otra sco exempel per era daventar sezza activa.

Cumpart da dunnas en la politica

Sco che la regenza grischuna ha communitgà mesemna, è la cumpart da dunnas fitg bassa en las autoritads communalas. Quai è il cas sin tut ils stgalims politics. Actualmain n'è nagina dunna en la regenza grischuna e mo 20% dal Cussegl Grond èn dunnas. Glied giuvna è en general sutrepreschentada. Tenor il studi «PROMO 35» da la Scola auta spezialisada dal Grischun han mo 6% da las persunas en la politica communal da damain che 35 onns. (cdm/fmr)



Era il cusseglier guvernativ Jon Domenic Parolini è stà da la partida.